

四庫全書

史部

欽定四庫全書

史部

資治通鑑後編卷一百

三十九至
四十一

詳校官檢討_臣德生

編修_臣裴謙覆勘

總校官進士_臣朱鈐

校對官主事_臣陳文樞

謄錄監生_臣積善

欽定四庫全書

資治通鑑後編卷一百三十九

刑部尚書徐乾學撰

宋紀一百三十九

起玄默執徐正月盡昭陽大荒落三月凡一年有三月

理宗建道備德大功復興烈文仁武聖明安孝皇

帝

紹定五年春正月己丑以孟珙為京西路兵馬鈐轄初
珙父宗政知棗陽招唐鄧蔡州壯士二萬餘人號忠順

軍命江海統之衆不服制置司以珙代海珙分其軍為
三衆皆帖然珙又叛平堰於棗陽自城至軍西十八里
由八壘河經漸水側水跨九阜建通天槽八十有三丈
溉田十萬立十莊三轄使軍民分屯邇儲豐初珙又命
忠順軍家自畜馬官給芻粟馬益蕃息至是以母憂起
復駐劄棗陽軍 庚寅詔李全之叛海陵簿吳禧罵賊
而死特贈朝奉郎官其一子 壬辰以史嵩之為京湖
安撫制置使知襄陽府 壬寅新作太廟成 蒙古兵

自唐州趣汴金元帥完顏兩羅索與戰於襄城敗績走
還汴金主召羣臣議尚書令史楊居仁請乘其遠至擊
之平章巴薩不從遣瑪楚勒等部民丁壯萬人開短堤
決河水以衛京城命瓜爾佳薩哈將步騎三萬巡河渡起
近京諸色軍家屬五十萬口入京城蒙古主用西夏人
額爾克計自河中由河清縣白坡渡河遣人馳報托壘以
師來會瓜爾佳薩哈行至封丘而還蒙古兵奄至瑪勒楚
等皆死丁壯得免者僅三百人蒙古主入鄭州遣蘓布

特攻汴金主召羣臣議所守有言珠格果勒齊所築裏城決不可守外城決不可棄於是決計守外城命修樓櫓器具時京城諸軍不滿四萬而城周百二十里不能徧守故議以遷避之民充軍又召在京軍官於上清宮平日防城得功者截長補短假借而用得百餘人又集京東西沿河舊屯兩都尉及衛州義軍凡四萬并丁壯二萬分置四面每面選千名飛虎軍以專救應然亦不能軍矣 乙未蒙古游騎至汴城金完顏哈達伊喇富哈

自鄧州率步騎十五萬赴援蒙古以騎三千尾之哈達等謀曰敵兵三千而我不戰是弱也進至鈞州沙河蒙古兵不戰而退金軍方盤營蒙古兵復來襲金軍不得休息食飲且行且戰至黃榆店距鈞州三十五里丁酉大雪不能進忽有旨云兩省軍悉赴京師哈達等遂發蒙古兵自北渡者畢集前後以大樹塞道楊沃衍奪路而前金軍遂次三峯山軍士有不食至三日者蒙古兵與河北兵合四面圍之熾薪燔肉更迭休息乘金困憊

開鈞州路縱之走而以生兵夾擊之金軍潰聲如崩山
武仙率三十騎入竹林中走密縣楊沃衍樊澤張惠步
持大槍奮戰而死哈達知大事已去欲下馬戰而富哈
已失所在乃與陳和尚等以數百騎走入鈞州蒙古主
在鄭州聞托壘與金相持遣昆布哈齊拉袞等赴之
至則金軍已潰於是乃合攻鈞州塹其城外哈達匿窟
室中城破蒙古兵發而殺之因揚言曰汝家所恃惟黃
河與哈達耳今哈達為我殺黃河為我有不降何待陳

和尚趨避隱處殺掠稍定乃出自言曰我金國大將欲見白事蒙古兵以數騎夾之詣托壘問其姓名曰我忠孝軍總領完顏陳和尚大昌原衛州倒回谷之勝皆我也我死亂軍中人將謂我負國家今日明白死天下必有知我者托壘欲其降不肯乃斫足脛折之劃口吻至耳嚙血而呼至死不屈蒙古將有義之者以馬漣酹而祝曰好男子他日再生當令我得之富哈走蒙古兵追躡擒之械至官山托壘欲降之往復數百言終不肯但

曰我金國大臣惟當金國境內死耳遂殺之金之健將
銳卒俱盡自是不可復振矣蒙古遂下商號嵩汝陝路
許鄭陳亳潁壽睢永等州時俘獲甚衆軍還逃者十七
八蒙古主下令凡居停逃民及資給者滅其家鄉社亦
連坐由是逃者莫敢舍多殍死道路即律楚材從容進
曰河南既平民皆陛下赤子走復何之奈何因一俘囚
連死數十百人乎蒙古主遂除其禁 庚子金主御端
門肆赦改元開興翰林學士趙秉文為赦文布宣悔悟

哀痛之意指事陳義辭情俱盡聞者莫不感勵洛陽人
至於慟哭 二月癸丑帝謁太廟 初金主聞蒙古入
饒風關遣圖克坦烏勒登行省閬鄉以脩潼關圖克坦伯嘉為
關陝總師便宜行事伯嘉馳入陝榜縣鎮遷入大城糧
斛輜重聚之陝州近山者入山寨避兵會阿里哈傳旨
召烏勒登援汴烏勒登遂與潼關總帥納哈塔哈順秦藍總帥
完顏重喜等帥軍十一萬騎五千盡撤秦藍諸關之備
從號入陝同華閬鄉一帶軍糧數十萬斛備關船二百

餘艘皆順流東下俄聞蒙古兵近糧皆不及載船悉空
下復盡起州民運靈寶硃石倉粟會蒙古游騎至殺掠
不可勝計金守將李平以潼關降於蒙古蒙古遂長驅
至陝烏勒登所發閭鄉軍士各以老幼自隨由西南徑入
太山冰雪中部將多叛去蒙古聞之自盧氏以數百騎
追及山路積雪晝日凍釋泥淖及脰隨軍婦女棄擲老
幼哀號盈路行至鐵嶺欲戰而饑憊於是重喜先降蒙
古斬之於馬前金兵遂大潰秦藍總帥府經歷商衡死

焉烏勒登哈順從數十騎走山谷間追騎擒之皆被殺時
慶善努行省徐州引兵入援至楊驛店馬蹢被擒見真
定史帥問曰君為誰史帥言我真定五路史萬戶也慶
善努曰是天澤乎曰然曰吾國已殘破公其以生靈為
念及見特默忒誘之使招京城不從又偃蹇不屈左右
以刀斫其足足折亦不降遂殺之 蒙古取金睢州遂
圍歸德府金行省持嘉紐勒歡命經歷冀禹錫守禦竭
其材智城得不陷 金復以完顏賽布為左丞相先是

賽布謂都事商衡曰古來宰相必用文人以其知為相之道賽布何所知使居此位吾恐他日史官書某時以某為相而國亡遂請致仕先是侯摯在都堂會議以國勢不支因論數事曰只是更無擘畫巴薩怒曰平章出此言國家何望耶賽布曰侯相言甚當巴薩含憤而罷至是蒙古攻汴日急財匱援絕金主大懼巴薩以為勢必講和和議定則首相當往為質乃力請金主起賽布為相且括汴京民軍二十萬分隸諸帥人月給粟一石

五斗 三月丁酉日生抱氣承氣 蒙古立砲攻洛陽
洛陽城中唯三峯潰卒三四千及忠孝軍百餘留守薩
哈連疽發於背不能軍妻通吉氏度城必破謂薩哈連
曰公受國家恩最厚今大兵臨城公不幸病不能禦敵
死猶可以報國幸無以我為慮薩哈連出巡城通吉氏
乃以平日衣服粧具玩好布之卧榻資貨悉散之家人
艷粧盛服過於平日戒其婢曰我死則扶置榻上以衾
覆我四圍舉火焚之無使兵見我面言訖閉門自經死

薩哈連從外至聞死狀乃拊榻曰夫人不辱我我可辱朝廷乎投濠而死元帥任守貞因行府事及守貞援汴河南人共擁強伸為府僉事領所有軍二千五百人甫三日蒙古兵圍城伸括衣帛為幟立之城上率士卒赤身而戰以壯士數百往來救應大呼以慙子軍為號其聲勢與萬衆無異兵器已盡以錢為鏃得蒙古兵一箭截而為四以筒鞭發之又創過砲用不過數人能發大石於百步外所擊無不中伸奔走四應所至必捷蒙古

益兵力攻凡三月餘不能拔乃退 蒙古主將北還遣
使自鄭州至汴諭金主降且索翰林學士趙秉文衍聖
公孔元措等二十七家及歸順人家屬伊喇富哈妻子
并繡女弓匠鷹人等金主乃封荆王守純子額爾克為曹
王議以為質密國公璫以額爾克幼請代行金主慰遣之
不聽其代璫越忠簡王永功之孫也壬寅命尚書左丞李
蹊送額爾克出質諫議大夫費摩阿古岱為講和使未行
蒙古蘓布特聞之曰我受命攻城不知其他乃立攻具

沿濠列木柵驅漢俘及婦女老幼負薪草填濠頃刻平
十餘步平章巴薩以議和不敢與戰城中喧鬧金主聞
之從六七騎出端門至舟橋時新雨淖車駕忽出都人
驚愕失措但跪於道旁有望而拜者金主麾之曰勿拜
恐泥汙汝衣老幼遮擁至有誤觸金主衣者少頃宰相
從官皆至進笠不受曰軍中暴露我何用此西南軍士
五六十輩進曰北兵填濠過半平章傳令勿放一鏃恐
壞和事豈有此計耶金主曰朕以生靈之故稱臣進奉

無不順從止有一子養未長成今往作質汝等畧忍待
曹王出韃靼不退汝等死戰未晚是日曹王行蒙古兵
併力進攻金砲石取良嶽太湖靈壁假山為之大小各
有斤重圓如燈毬蒙古砲破大礮或碌礮為二三皆用
之攢竹砲有至十三稍者每城一角置砲百餘枚更迭
上下晝夜不息數日石幾與裏城平而城上樓櫓皆拆
故宮及芳華玉溪之材為之合抱之木隨擊而碎以馮
冀麥秸布其上網索旃褥固護之其懸風板之外皆以

牛皮為障蒙古兵以火砲擊之隨即延藝不可撲救城乃周世宗所築取虎牢土為之堅密如鐵受砲所擊唯凹而已蒙古兵濠外築城圍百五十里城有乳口樓櫓壕深丈許濶亦如之三四十步置一鋪鋪置百許人守之初巴薩命築門外短牆委曲陘隘僅容三二人得過以防蒙古奪門及被攻諸將請乘夜斫營軍乃不能猝出此出已為蒙古所覺後募死士千人穴城由壕徑渡燒其砲座城上懸紅紙燈為應約燈起渡濠又放紙鳶

置文書其上至蒙古營斲之以誘被俘者皆為蒙古所覺時有火砲名震天雷用鐵錐盛藥以火點之砲起火發其聲如雷聞百里外所藝園半畝已上火點著鐵甲皆透蒙古時為牛皮洞直至城下掘城為龕間可容人城上莫如之何乃以鐵繩懸震天雷順城而下至掘處火發人與牛皮皆碎迸無迹又有飛火槍注藥以火發之輒前燒十餘步蒙古唯畏此二物攻城十六晝夜內外死者以百萬計明惠皇后陵被發金主遣中官求得

其柩復葬之蘓布特知不可取乃為好語曰兩國已講和更相攻耶金主因就應之乃遣戶部侍郎楊居仁出宜秋門以酒炙犒蒙古兵且以金帛珍異賂之蘓布特乃許退兵散屯河洛之間方北兵之攻城也矢石如雨忽見一女子呼於城下曰我倡女張鳳奴也許州破被俘至此彼軍不日去矣諸君努力為國堅守無為所欺也言竟投濠而死金主遣使馳祭於西門敵退參政持嘉哈沙以守城為已功欲率百官入賀參政內族色哩

曰城下之盟春秋以為恥況以罷攻為可賀耶哈沙怒
曰社稷不亡君后免難汝等不以為喜耶乃命趙秉文
為表秉文曰春秋新宮災三日哭今園陵如此酌之以
禮當慰不當賀事乃已初城之被圍右司諫陳奇上書
請戰其畧曰今日之事皆由陛下不斷將相怯懦若因
循不決一旦無如之何恐君臣相對涕泣而已其言剴
切深中時病哈沙見之大怒召奇入省呼其名責之曰
子為陳山可乎果如子言能退大敵我當世世與若為

僕聞者莫不竊笑蓋不識奇字分為兩也奇策竟不行
識者惜之 甲子金主御端門肆赦改元天興詔內外
官民能完復州郡者功賞有差出金帛酒炙犒餼軍士
減御膳罷冗貲放宮女上書不得稱聖改聖旨為制旨
釋犒厲王衛紹王二族禁錮是日解嚴步兵始出封丘
門外采蔬薪 金平章政事完顏巴薩恒怯無能性復
貪鄙軍士憤其不戰已薩不自安謂尚書令史元好問
曰我妨賢路久矣得退為幸為我撰乞致仕表項之金

主已遣使持詔至其第令致仕軍士欲殺之已薩懼一
夕數遷金主以親軍二百陰為之衛軍士無以泄其憤
遂相率毀其別墅夏四月丁卯起魏了翁以集英殿
撰知遂寧府辭不拜五月辛卯臣僚言積陰霖霪必
有致咎之徵比聞蘄州進士馮杰本儒家都大坑冶司
抑為鑪戶誅求日增杰妻以憂死其女繼之弟大聲因
赴訴死於道路杰知不免舉火自經死民冤至此豈不
上千陰陽之和詔都大坑冶罷職金汴京大寒如冬

因大疫凡五十日諸門出柩九十餘萬貧不能葬者不
在是數尋以疫後園戶僧道醫師鬻棺者擅厚利命有
司倍征之以助國用 癸巳太白經天晝見 六月乙
丑熒惑填星合於婁熒惑順行犯填星 己巳金詔贈
完顏陳和尚鎮南軍節度使立保忠廟碑 金徐州埽
兵總領王祐張興都統封仙等夜燒草場作亂逐行省
圖克坦伊圖蒙古國安用率兵入徐州執王祐等斬之以
封仙為元帥主徐州事圖克坦伊圖奔宿州節度使赫舍

哩阿古不納乃與諸將駐於城南時宿之鎮防有逃還
阿古以為叛歸亦不納城中鎮防千戶高埒克謀就徐
州將士內外相應以取宿因歸楊妙真半夜開門納徐
州總領王德全等縛阿古父子殺之請伊圖主州事伊
圖不從率其將吏西走至穀熟遇蒙古軍不屈而死
秋七月丁酉以禮部尚書陳貴誼同僉書樞密院事

金飛虎卒申福等殺蒙古行人唐慶等三十餘人於館
金主不問和議遂絕 蒙古國安用既得徐州金宿州

東面總帥劉安國邳州杜政皆以州歸之安用遂據三州蒙古帥主伊圖聞之怒曰此三州吾當取安用何人輒受其降遣將張進率兵入徐欲圍安用奪其州安用懼乃與徐州總帥王德全刼殺張進及海州元帥田福等數百人與楊妙真絕還邳州會山東諸州及徐邳宿三州主帥刑白馬結盟誓歸金既盟諸將皆散去安用無所歸遂同德全安國因宿州從宜衆僧努自通於金衆僧努以聞未報而安用率兵萬人攻海州衆稍散去

安用自知失計於是復金衣冠楊妙真怒安用叛已又懼為所圖乃悉屠安用家屬走還青州安用等選兵分將期必得楊妙真金主遣近侍直長因世英等持手詔至邳封安用為兗王賜姓完顏改名用安且授以空頭河朔山東赦文使得便宜從事安用始聞使至猶豫未決遣迎使者監於州廨問所以來使者對以封建事安用意頗順明日出見使者跪揖如等夷坐定語世英曰予向隨韃靼兵攻汴嘗於開陽門下與侯摯議內外夾

擊此時韃靼病者衆十七頭項皆在京城若從吾言出
軍中興久矣朝廷無一敢決者今日悔將何及言竟而
起因使人取金所賜物遍觀之喜見顏色乃設宴拜受
如儀令主事常謹隨世英奉表入謝金主復遣世英賜
以鐵券虎符龍文衣玉魚帶及郡王宣世襲千戶宣各
十聽賜同盟世英過徐德全安國說之曰朝廷恩命豈
宜出自安用郡王宣吾二人最當得者乞就留之世英
乃留郡王宣世襲千戶宣各二由是與安用有隙金

恒山公武仙等會兵救汴初三峯之敗仙走南陽收潰
軍得十萬人屯留山汴京被圍金主詔書與鄧州行省
完顏思烈鞏昌總帥完顏呼沙呼合兵入援仙至密縣
東遇蒙古兵即按軍眉山店報思烈曰阻澗結營待仙
至俱進思烈急欲至汴不聽金主又命樞密使持嘉哈
沙帥兵應仙思烈等至京水蒙古乘之不戰而潰仙衆
亦散走還留山哈沙屯中牟三日聞思烈軍潰即夜棄
輜重馳還先是有投匿名書於御路者云副樞哈沙總

帥薩哈參政恩楚皆國賊朝廷不殺衆軍亦須殺之為
國除害衛士以聞薩哈飲藥死恩楚稱疾不出唯哈沙
坦然若無事者金主亦無所問及是言者謂哈沙始則
抗命不出中則逗遛不進終則棄軍先遁不斬之無以
謝天下金主乃貸死免為庶人籍其家以賜軍士 八
月乙卯起真德秀為徽猷閣待制知泉州 己未魏了
翁以寶章閣待制知瀘州瀘大藩控制遶面二千里而
武備不修城郭不治了翁乃奏葺其城樓櫓雉堞增置

器械教習牌手中嚴軍律興學校蠲宿負復社倉勅義
塚建養濟院居數月百廢具舉 乙丑賜進士徐元杰
以下四百九十三人及第出身 高麗盡殺蒙古所署
官吏徙居江華島蒙古薩克達伐之中矢卒 九月辛
丑夜金汴京大雷工部尚書范乃速震死 乙巳雨雹
雷 閏月己酉有流星大如太白庚戌彗出於角帝避
殿減膳撤樂詔中外臣僚指陳缺失無有隱諱諸路監
司察守令之貪廉仁暴及民間利便疾苦以聞 戊辰

史彌遠乞歸田里不允 金主以和議既絕懼兵再至
乃復簽民兵為守禦備遂括汴京粟以完顏珠克等主
之置局以推舉為名珠克諭民曰汝等當從實推舉粟
如一旦糧盡令汝妻子作軍食復能吝否既而罷括粟
復以進奉取之且賣官及令民買進士第前御史大夫
內族哈準復覬進用建言京城括粟尚可得百萬石金
主乃命哈準為參知政事與左丞李蹊復括之哈準先
令各家自實壯者存石有三斗幼者半之仍書其數門

首敢有匿者以升斗論罪京城三十六坊各選深刻者
主之完顏玳珠尤酷暴有寡婦二口實豆六斗內有蓬
子約三升玳珠笑曰吾得之矣執而以令於衆婦泣懇
曰妾夫死於兵姑老不能為養故雜蓬粃以自食非敢
以為軍儲且三升六斗餘也玳珠不聽竟杖死聞者股
栗盡棄其餘糞溷中或白於李蹊蹊輦感曰白之參政
及白哈準哈準曰人云花又不損蜜又得成余謂花不
損何由成蜜且京城危急今欲存社稷耶存百姓耶衆

莫敢言所括不能三萬斛滿城蕭然死者相枕貧富束手待斃遂至人相食金主聞之命出太倉米作粥以食餓者翰林直學士舒穆魯愛實嘆曰與其食之寧如勿奪為奉御博諾所告金主怒送愛實有司賴近侍李大節救免蒙古皇太弟托壘卒於師蒙古主還龍庭托壘娶克呼部王汗之弟阿法布女生六子長蒙古次默爾根三呼土克圖四呼必賚是為世祖五實哩六額呼布格冬十月戊子以星變大赦泗州路分劉虎等焚斲

浮橋以遇金兵因遣將攻盱眙軍未下金泗州總領完
顏實庫叛防禦使圖克坦塔喇聞變取朝服望闕拜後投
水而死實克遂以州附楊妙真總帥納哈塔邁珠亦以盱
眙來歸詔改為招信軍 金以汪世顯為鞏昌便宜總
帥初世顯以戰功為征行從宜分治陝西西路時調度
窘迫世顯發家貲率豪右助邊鄰郡效之軍餉遂足金
主以呼沙呼為鞏昌總帥世顯同知府事二人盡忠固
守以抗蒙古及呼沙呼勤王東下而潰乃以世顯代之

世顯勵志自奮糧械精贍 十一月喬行簡累疏乞歸
田不允 金完顏用安欲圖山東累徵兵於徐宿王德
全劉安國不應會金主以密詔徵兵東方用安因聲言
入援駐師徐州城下以招德全德全不出殺封仙遣杜
政出城會劉安國與宿帥衆僧努引兵入援至臨渙用
安遣人殺安國因攻徐州三月不能下退歸漣水以軍
食不給來乞糧朝廷陽許之用安即日改從宋衣冠而
陰通於金糧乏卒多流亡乃以嚴刑禁亡者血流滿道

十二月丙子朔進封才人賈氏為貴妃 壬午皇太

后楊氏殂外朝以日易月宮中行三年喪喬行簡上疏
曰向者陛下內廷舉動皆有稟承小人縱有蠱惑干求
之心猶有所忌憚而不敢發今者安能保小人之不萌
是心陛下又安保聖心之不無少肆陛下為天下君當
懋建皇極一循大公不應私徇小人為其所誤凡為此
者皆戚畹肺腑之親近習貴幸之臣奔走使令之輩外
取貨財內壞綱紀上以罔人君之聰明來天下之怨謗

下以撓官府之公道亂民間之曲直縱而不已其勢必至於假采聽之言而動傷善類設衆人之譽而進拔僉人借納忠効勤之意而售其陰險巧佞之姦日積月累氣勢益張人主之威權將為所竊弄而不自知矣陛下衰經在身愈當警戒宮庭之間既無所嚴憚嬪御之人又視昔衆多以春秋方富之年居聲色易縱之地萬一於此不能自制必於盛德大有虧損願陛下增加警省蒙古再遣王楫來京湖議夾攻金京湖安撫制置使

史嵩之以聞朝臣皆以為可遂復讐之舉獨趙范不喜
曰宣和海上之盟厥初甚堅迄以取禍不可不鑒帝不
從命嵩之報使許之嵩之乃遣鄒伸之往報蒙古許俟
成功以河南地來歸金主以糧盡援絕勢益危急遣
近侍就白華問計華附奏言車駕當出就外兵留荆王
監國任其裁處陛下既出遣使告語北朝我出非他處
收整兵馬止以軍卒擅殺唐慶和議從此斷絕京師今
付之荆王乞我一二州以老耳如此則太后皇族可存

正如春秋紀季入齊為附庸之事陛下亦得少寬矣遂起華為右司郎中召諸臣議親出或言歸德四面皆水可以自保或言宜沿西山入鄧或言設欲入鄧蒙古蘓布特在汝州不如取陳蔡路轉往鄧下金主未決復以問華華曰歸德城雖堅久而食盡坐以待斃決不可往既汝州有蘓布特則鄧下亦不可往以今日事勢博徒所謂孤注也孤注云者止有背城之戰為今之計當直赴汝州與之一決然汝州戰不如半塗戰半塗戰不如

出城戰蓋我軍馬之食力猶在也若出京益遠軍食日減馬食野草事逾難矣若我軍便得戰存亡決此一舉外則可以激三軍之氣內則可以慰都人之心或止為避遷計人心顧戀家業未必毅然從行可詳審之金主不從禮部尚書舒穆魯克勳率朝官劉肅田芝等二十人詣仁安殿言於金主曰臣等聞陛下欲親出竊謂此行不便金主曰我不出軍分為二一軍守一軍出戰我出則合為一世勳曰陛下出則軍分為三一守一戰一中

軍護從不若不出之為愈也金主曰卿等不知我若得
完顏仲德武仙付之兵事何勞我出今日將兵者官努
統馬兵三百止矣劉益將步兵五千止矣欲不自將得
乎又指御榻曰我此行豈復有還期但恨我無罪亡國
耳我未嘗奢侈未嘗信任小人世勳應聲曰陛下用小
人則亦有之金主曰小人謂誰世勳應聲曰伊喇寧古
鄂敦察遜烏色惹完顏長樂皆小人也陛下不知為小
人所以用之肅與世勳復多所言良久君臣涕泣而別

乙酉金主集軍士於大慶殿諭以京城食盡今擬親出
諸將佐合辭奏曰陛下不可親出止可命將金主欲以
富察官努為馬軍帥高顯為步軍帥劉益副之三人欲
奉命權參知政事內族恩楚大罵曰汝輩把鋤不知高
下國家大事敢易承耶衆默然唯官努曰若將相可了
何至使我輩事亦中止遂以右丞相賽布平章巴薩右
副元帥恩楚左丞相李蹊元帥左監軍圖克坦伯嘉等帥
諸軍扈從參政努色爾樞副兼知開封錫訥額布勒等留守

乃發府庫及內府器皿宮人衣物賜將士民間開傳車
駕往歸德軍士家屬留汴食盡城中俱餓死矣縱能至
歸德軍馬所費支吾復得幾許日金主使賽布宣言曰
前日巡狩之議止為白華都改今往汝州索戰矣金主
發汴京與太后皇后妃主別大慟至開陽門詔諭留守
兵士曰社稷宗廟在此汝等壯士毋以不預進發之數
便謂無功若保守無虞將來功賞豈在戰士下聞者皆
灑泣是日鞏昌元帥呼沙呼援兵至初金主徵諸道兵

入援往往觀望不進或中道遇兵而潰唯呼沙呼提孤
軍千人歷秦藍商鄧擷菓菜為食間闕百死至汴為金
主謀曰京西三百里之間無井竈不可往不如幸秦鞏
金主遂決意東行甲辰進次黃陵岡時巴薩擊蒙古降
其兩砦得河朔降將金主赦之授以印符羣臣遂固請
以河朔諸將導鼓行入開州取大名東平豪傑當有響
應者鄂敦察遜曰太后中宮皆在南京北行萬一不如
意聖主孤身欲何所為不如先取衛州還京為便巴薩

曰聖體不便鞍馬今可駐歸德臣等率降將往東平因
而經畧河朔官努曰衛州有糧可取巴薩曰京師且不
能守就得衛州欲何為耶金主惑之遂一意向河朔蒙
古蘓布特聞金主棄汴復進圍之

六年春正月丙午朔金主乘舟濟河大風後軍不克濟
丁未蒙古將和克乃追擊於南岸金元帥賀德希力戰
死兵溺者千人元帥珠爾都尉赫舍哩克倫等死之金
主在北岸望之震懼庚戌次漚麻岡遣巴薩帥師攻衛

州至城下以御旗招之城中不應蒙古聞之自河南渡河巴薩遂退師蒙古史天澤以騎兵踵其後丁巳戰於白公廟金師敗績巴薩棄軍東遁元帥劉益上黨公張開皆為民家所殺金主進次蒲城復還魏樓村猶欲俟蒙古兵至決戰少頃巴薩至倉皇言軍已潰北兵近在堤外請幸歸德金主遂與副元帥和爾和等六七人夜登舟潛渡河走歸德翌日諸軍始聞金主棄師遂大潰金主入歸德遣奉御珠嘉達薩布往汴京奉迎太后及

后妃諸軍怨憤巴薩自蒲城還不敢入金主召巴薩至
數其罪下獄死仍籍其家財以賜將士曰汝輩宜竭忠
力毋如斯人誤國初瀕河居民聞金主北渡築垣塞戶
潜伏洞穴及見富察官努一軍號令明肅所過無絲髮
犯老幼婦女無復畏避及巴薩往衛州縱軍四掠哭聲
滿野所過邱墟一飯之費至數十金公私皇皇民始思
畔故衛州堅守而蒙古之追無來援者以至於敗 戊
辰史彌遠加食邑千戶 初汴人以金主親出師日聽

捷報及聞軍敗衛倉皇走歸德始大懼時蘓布特攻城
日急内外不通米升至銀二兩殍者相望縉紳士女多
行乞於市至有自食妻子者諸皮器物皆煮食之貴家
第宅市樓肆館皆撤以爨及金主遣使至汴奉迎兩宮
人情益不安西面元帥崔立性淫狡因民洶洶與其黨
韓鐸藥安國等潛謀作亂左司都事元好問謂錫訥額布
勒曰自車駕出京今二十日許又遣使迎兩宮民間皆
謂國家欲棄京城相公何以處之錫訥額布勒曰吾二人

惟有一死爾好問曰死不難誠能安社稷救生靈死可也如其不然徒欲以一身飽五十紅袖軍亦謂之死耶錫訥額布勒不答時兩宮已出至陳留見城外二三處火起疑有兵復馳還汴京明日崔立率甲卒二百橫刃入省中拔劍指完顏努色爾及錫訥額布勒曰京城危困已極二公坐視何也二相曰有事當好議之何遽如是立麾其黨先殺阿布次殺努色爾及左司郎中鄂敦額埒等十餘人即諭百姓曰吾為二相閉門無謀今殺之為汝一

城生靈請命衆皆稱快金自南遷後為宰執者往往無
恢復之謀臨事相習低言緩語互相推讓以為養相體
每有四方災異民間疾苦將奏必相謂曰恐聖主心困
事至危處輒罷散曰俟再議已而復然或有言當改革
者輒以生事抑之故所用必擇悞熟無鋒銳者用之每
北兵壓境則君臣相對泣下或殿上發長吁而已兵退
則大張具會飲黃閣中矣因循苟且竟至亡國 崔立
勒兵入宮集百官議所立立曰衛紹王太子從恪其妹

公主在北兵中可立之乃遣韓鐸以太后命往召從恪
至以太后誥命為梁王監國百官拜舞遂送款詣蘓布
特軍立自為太師都元帥尚書令鄭王弟倚為平章政
事侃為殿前都點檢其黨皆拜官元好問亦為左右司
員外郎開封判官李禹翼棄官去戶部主事鄭著名不
起右副點檢納哈塔德輝左右司員外郎聶天驥御史大
夫費摩阿古岱諫議大夫左右司郎中烏凌阿努色爾左
副點檢完顏阿薩爾戶部尚書完顏珠克講議富察琦奉

御完顏僧格皆死焉僧格將死與其妻溫特赫氏訣溫特赫氏曰君能為國家死我不能為君死乎一婢曰主死婢將安歸是日夫婦以一繩同縊婢從之 壬申蘓

布特至青城崔立服御衣儀衛往見之蘓布特喜飲之酒立以父事之還城悉燒樓櫓蘓布特益喜立託以軍前索隨駕官吏家屬軍民子女聚之省中親閱之日亂數人猶以為不足乃禁民間嫁娶有以一女之故致數人死者總領完顏長樂妻富察氏臨洮總管圖們呼圖克

們妻烏庫哩氏進士張伯豪妻聶舜英及參政完顏蘓
呼妻義不為所汙皆自盡舜英左右司貲外郎天驥之
女也未幾立遷梁王及宗族近屬於宮中以腹心守之
限其出入以荆王府為己私第取內府珍玩充實之羣
小附和請建功德碑翟奕以尚書省命翰林直學士葉
城王若虛為文若虛私謂元好問曰今名我作碑不從
則死作之則名節掃地不若死之為愈然我姑以理論
之乃謂奕曰丞相功德碑當指何事為言奕曰丞相以

京城降活生靈百萬非功德乎若虛曰學士代王言功德碑謂之代王言可乎且丞相既以城降則朝官皆出其門自古豈有門下人為主帥頌功德而可取信於後世者哉奕不能對事遂得已尚書右丞持嘉慰忻致仕居汴聞變召家人付以後事望睢陽慟哭自縊而死其宗人參政喀齊喀既廢居汴常怏怏蘓布特遣人招之即治裝欲行詣省別崔立方對語適一人自歸德持文書至發視之乃行省傳金主語諭喀齊喀反正者也立怒比

左右斬之 二月丁卯以余天錫為禮部侍郎兼侍讀

癸卯熒惑犯東井 三月丙辰大雨雹 金主在歸

德隨駕親軍及河北潰軍漸集持嘉紐勒歡懼不能給

白於金主乞遣出城就糧於徐陳宿三州金主不得已

從之止留富察官努忠孝馬軍四百五十人馬用軍七

百人諸軍既出城金主召官努謂曰紐勒歡盡散衛兵

卿當小心官努以馬用本歸德小校一旦拔起心常輕

之又以金主時獨召用計事因謀圖用時蒙古特默岱

圍亳州日遣兵薄歸德民心搖搖官努請北渡河再圖
恢復紐勒勸沮之官努不悅乃私與完顏用安謀邀金
主幸海州金主不從官努積忿異志益定李蹊以聞金
主深憂之乃諭馬軍總領赫舍哩阿勒哈內族錫馨陰
察其動靜阿勒哈及以金主意告官努金主復懼官努
及用相圖因以為亂命宰執置酒和解之用即撤備戍
辰官努乘隙率衆攻用殺之遂以卒五十人守行宮劫
朝官聚於都水務呼哩宅以兵監之驅紐勒歡至其家

悉出所有金貝然後殺之乃遣都尉馬實被甲持刃刼直長努色勒於金主前金主擲所握劍於地謂實曰為我言於元帥我左右止有此人且留侍我實乃退官努因大殺朝官李蹊以下凡三百人軍士死者三十人薄暮官努提兵入見言紐勒歡反臣殺之矣金主不得已暴紐勒歡罪而以官努權參知政事兼左副元帥

資治通鑑後編卷一百三十九

欽定四庫全書

資治通鑑後編卷一百四十

刑部尚書徐乾學撰

宋紀一百四十

起昭陽大荒落四月盡開達
數祥十二月凡一年有九月

理宗建道備德大功復興烈文仁武聖明安孝皇

帝

紹定六年夏四月壬寅葬恭聖仁烈皇后於永茂陵

金雀立以天子袞冕后服進於蘓布特又括在城金銀

搜索薰灌訊掠慘酷貴族富人不堪其毒竊相語曰攻城後七八日中諸門出葬者百萬恨不早預其數立時與其妻入宮兩宮賜之不可勝計立因諷太后作書陳天時人事遣金主乳母入歸德招降立遂以太后王氏皇后圖克坦氏梁王從恪及荆王守純諸妃嬪凡車三十七兩宗室男女五百餘人衍聖公孔元楷名儒梁陟及三教醫流工匠繡女赴青城蘓布特殺二王及族屬而送后妃等於和林在道艱楚萬狀尤甚於靖康之禍寶

符李氏行至宣德州自縊於摩訶院佛像前且書其門
曰寶符御侍此處身故見者哀之諸后妃不知所終蘓
布特入汴城崔立時在城外兵先入其家取其妻妾寶
玉立歸大慟而已初蒙古之制凡攻城不降矢石一發
則屠之汴京既陷蘓布特遣使言於蒙古主曰此城相
抗日久士卒多傷請屠其城耶律楚材聞之馳見蒙古
主曰將士暴露數十年所爭者土地人民耳得地無民
將焉用之蒙古主未許楚材又曰凡弓矢甲仗金玉等

匠及官民富貴之家皆聚此城殺之則一無所得是徒勞也乃詔除完顏氏一族外餘皆原免時避兵在汴者尚百四十萬戶皆得保全遂為定制 金唐鄧州行省

武仙次於順陽與唐州守將武天錫鄧州守將伊喇瑗相犄角謀迎金主入蜀遂犯光化其鋒甚銳孟珙逼天錫壘一鼓拔之壯士張子良斬天錫首以獻俘將士四百餘人又敗金人於呂堰俘獲不可勝計遂攻順陽武仙敗走馬蹬山縣令李英及申州安撫張林皆以城降

伊喇瑗請降珙納之為易衣冠以賓禮見於是降者相繼珙言於史嵩之曰歸附之人宜因其鄉土而使之耕因其人民而立之長少壯籍為軍俾自耕自守才能者分以土地任以職事使各招其徒以殺其勢嵩之從之

五月庚戌太白熒惑合於柳初金主遣右司郎中白華召鄧兵入援事久不濟淹留於館會伊喇瑗以鄧降華亦從至襄陽帥臣署華為制幹尋改鈞州提督其後州將范用吉殺長吏送款於蒙古華因而北歸士大

夫以華宿儒貴顯國危不能以義自處為貶云 衛州
白公廟之潰富察官努母為蒙古所獲金主命官努因
其母以請和官努乃詣亳州密與特默岱言欲劫金主
以降特默岱信之還其母因定和計官努乃日往來講
議或乘舟中流會飲其遣來使者二十餘輩金主又密
令官努以金銀牌與之勿令還營因知王家寺大將所
在官努遂定斫營之策端午日祭天軍中因備火槍戰
具官努夜率忠孝軍四百五十人登舟殺守隄邏卒徑

至特默岱營金主御北門繫舟待之慮不勝則走徐州
四更接戰忠孝軍卻而復進官努以小船分軍五七十
出柵外腹背攻之持火槍入蒙古軍特默岱不能支大
潰溺死三千五百餘人官努盡焚其柵而還遂真拜左
副元帥參知政事命習顯總其軍以守亳州官努既敗
特默岱勢益暴橫居金主於照碧堂諸臣無一人敢奏
對者金主悲泣語近侍曰自古無不亡之國不死之君
但恨我不知人為此奴所困耳於是內局令宋珪奉御

女錫林完顏恩楚烏克遜愛實等密謀誅官努且聞蔡州城
堅池深兵衆糧廣咸勸幸之會蔡息陳頴等州便宜總
帥烏庫哩欽運米四百斛至歸德且請臨幸金主遂決
策還蔡六月己卯官努自亳州還金主諭以幸蔡官努
力陳不可至於扼腕頓足意趣叵測因出號於衆曰敢
言南遷者斬衆以官努為無君諷金主早為計金主遂
與珪等謀召宰相議事而令恩楚伏照碧堂門間官努
進見恩楚從後刺其肋金主亦拔劍斫之官努中創投

城下以走恩楚愛實追殺之忠孝軍聞變皆擐甲思楚
請金主親撫慰之於是金主御雙門赦忠孝軍以安反
側金主以強伸守中京有功降詔褒諭授中京留守
又以參政內族思烈自南山領軍十餘萬入洛行省事
伸建一堂於洛川驛東名曰報恩刻詔文於石願以死
自效蒙古自汴驅思烈之子於金昌府東門下誘思烈
降思烈命左右射之既而聞崔立之變病不能語而死
總帥呼喇岱呼圖克代行省事伸行總帥府事月餘糧盡

軍民稍散蒙古兵復至陳於洛南伸陳於水北蒙古韓
元帥匹馬立水濱招降伸躍而射之韓奔還陣率步卒
數百奪橋伸軍一卒獨出拒之殺數人伸即手解都統
銀牌佩之士氣復振初城外四隅至五門內外皆有屏
謂之迷魂牆蒙古以五百騎迫之伸率卒二百鼓譟而
出蒙古退走呼圖克以蒙古兵強即以輕騎挈妻子奔蔡
州鷹揚都尉獻西門以降伸知城不能守率死士數十
突東門出轉戰至偃師力盡就執載以一馬擁迫而行

將見蒙古帥蒼爾伸語不遜兵卒誘之曰汝能北面一
屈膝當貸汝命伸不從左右持使北面伸拗鬚南向遂
殺之 辛卯金主發歸德留元帥王壁守之時久雨朝
士扈從者徒行泥水中掇青棗為糧足脰盡腫明日至
亳州金主黃衣皂笠金兔鶻帶以青黃旗二導前黃繖
擁後從者二三百人馬五十匹而已城中父老拜伏道
左金主遣近侍諭以國家涵養汝輩百有餘年今朕無
德令汝塗炭朕不足言汝輩無忘祖宗之德衆皆呼萬

歲泣下留一日進次亳南六十里避雨雙溝寺中蒿艾
滿目無一人迹金主太息曰生靈盡矣為之一慟己亥
入蔡州父老羅拜於道見儀衛蕭條莫不感泣金主亦
歔歔久之遂以完顏呼沙呼為尚書右丞總領省院事
烏庫哩鎬為御史大夫總帥如故張天綱權參知政事
富珠哩小羅索僉書樞密院事呼沙呼有文武材事無
巨細率親為之選士括馬繕治甲兵未嘗一日忘奉幸
秦鞏之志近侍久困睢陽幸即汝陽之安皆娶妻營業

不願遷徙日夕進言西幸不便金主信之呼沙呼惟深
居燕坐瞑目太息而已時蒙古兵去蔡差遠商販漸集
金主安之命選室女備後宮及修見山亭為遊息之所
呼沙呼切諫乃止呼沙呼定進馬遷賞格得馬千餘匹
又遣使分詣諸道選兵詣蔡得精銳萬餘兵威稍振忠
孝軍捉控李德率十餘人乘馬入省大呼以月糧不優
幾於罵詈呼沙呼縛德杖之金主諭呼沙呼曰此軍得
力方以倚用卿何不容忍責罰乃爾呼沙呼對曰時方

多故錄功隱過自陛下之德至於將帥之職則不然小
犯則決大犯則誅強兵悍卒不可使一日不在紀律蓋
小人之情縱則驕驕則難制睢陽之禍豈獨官努之罪
亦有司縱之太過耳今欲更易前轍不宜愛克厥威賞
必由中罰則臣任其責軍士聞之無復敢犯法者時從
官近侍皆窮乏悉取給於烏庫哩鎬則不能人滿其欲
日夕交譖於金主至以尚食闕供為言金主怒遂疎鎬
鎬憂憤成疾多不視事 蒙古耶律楚材請以孔元楷

襲封衍聖公從之

秋七月孟珙大敗金武仙於馬蹬

山降其將劉儀珙問仙虛實儀言仙所據九砦其大砦石穴山以馬蹬沙窩砦山三砦蔽其前三砦不破石穴未可圖也若先破離金砦則砦山沙窩孤立矣珙乃遣兵攻離金掩殺幾盡是夕復令壯士搗王子山砦斬金將首而出遂圍馬蹬殺戮山積還至沙窩西與金人戰大捷未幾丁順復破默候里砦於是仙之九砦六日破其七砦召儀曰此砦既破板橋石穴必震汝能為我招

之乎儀請選婦人三百偽逃歸懷招安榜以往珙料仙
勢窮感必上岵山絕頂窺伺乃令樊文彬駐軍其下已
而仙衆果登山文彬麾旗伏兵四起仙衆失措枕藉崖谷
殺其將烏色惹擒七百三十人棄鎧甲如山薄暮珙進
軍至小水河儀言仙謀往商州依險以守然老稚不願
北去珙曰進兵不可緩夜漏下十刻召文彬等受方畧
明日攻之時積雨未霽文彬患之珙曰此雪夜擒吳元
濟之時策馬直至石穴分兵進攻自寅至巳破之仙走

追至鮎魚砦仙望見易服而遁復戰於銀葫蘆山又敗之仙與五六騎奔追之隱不見降其衆七萬珙還襄陽八月蒙古都元帥塔齊爾使王楫至襄陽約攻蔡州塔齊爾博勒呼之從孫也史嵩之先以兵會伐唐州時城中糧盡人相食金將烏庫哩黑漢殺其愛妾以啖士士爭殺其妻子官屬聚議欲降黑漢持之益堅有總領趙超爾者開門納官軍黑漢率兵巷戰為官軍所獲脅使降黑漢不屈遂殺之主帥富察某為部曲兵所叛城

遂降官軍駐息州南降者日衆息州刺史烏庫哩呼嚕
懼請益兵為備金主以叅知政事穆延烏勒登僉書樞密
院富珠哩中羅索帥忠孝軍五百行金主諭之曰北兵
所以常取勝者恃北方之馬力就中國之技巧耳我實
難與之敵至於宋人何足道哉朕得甲士三千縱橫江
淮間矣以呼嚕畏縮命瓜爾佳糾珠代之 九月壬寅朔
日有食之 辛酉經筵官請以御製敬天法祖事親齊
家四十八條及緝熙殿榜殿記宣付史館 金使完顏

阿古岱來乞糧將行金主諭之曰宋人負朕深矣朕自即位以來戒飭邊將無犯南界邊臣有請征討者未嘗不切責之向得宋一州隨即付與近淮陰來歸彼多以金幣爲贖朕若受財是貨之也付之全城秋毫無犯清口臨陣生獲數千人悉以資糧遣之今乘我疲敝據我壽州誘我鄧州又攻我唐州彼為謀亦淺矣蒙古滅國四十以及西夏夏亡及於我我亡必及於宋唇亡齒寒自然之理若與我連和所以為我者亦為彼也御其以

此意曉之阿古岱至朝廷不許 庚戌金主以重九拜
天於節度使廳羣臣陪從成禮金主戒諭之因賜卮酒
酒未竟邏騎馳奏敵兵數百突至城下將士踴躍咸請
一戰金主許之是日分兵防守四面及子城衆出戰蒙
古兵奔潰塔齊爾以數百騎復駐城東金主遣兵接戰
又敗之自是蒙古不復薄城分築長壘圍之 冬十月
史嵩之命孟珙江海帥師二萬運米三十萬石赴蒙古
之約塔齊爾大喜益修攻具斲木之聲聞於城中城中

益恐往往竊議投降呼沙呼日以國家恩澤君臣分義
撫循其民且營畫禦備未嘗入私室軍民感奮始有固
志南北兩軍以攻具薄城金盡籍民丁防守民丁不足
復括婦人壯健者假男子衣冠運木石金主親出撫諭
之金人自東門出戰孟珙遮其歸路得降人言蔡城中
饑珙曰已窘矣當盡死守之以防突圍珙與塔齊爾約
南北軍毋相犯塔齊爾遣張柔帥精兵五千薄城金人
鈎二卒以去柔中流矢如蝟珙麾先鋒救之挾柔以出

明旦珙殊死戰進逼柴潭立柵潭上命諸將奪柴潭樓
金人來爭諸軍魚貫而上遂拔柴潭樓蔡州恃潭為固
外即汝河潭高於河五六丈城上金字號樓伏巨弩相
傳下有龍人不敢近將士疑畏珙召麾下飲酒再行謂
曰柴潭樓非天造地設伏弩能射遠而不可射近彼所
恃此水耳決而注之洄可立待遂鑿隄潭果決入汝珙
命實以薪葦蒙古亦決練江於是兩軍皆濟己卯攻外
城破之進逼土門金人驅其老穉熬為油號人油砲人

不堪其楚珙遣道士說止之金總帥富珠哩中羅索帥
精銳五百夜出西門人荷束藁沃油其上將燒兩軍寨
及砲具蒙古兵先覺之伏於隱處挽强弩百餘火發矢
亦發金兵却走傷者甚衆羅索僅以身免兩軍合攻西
城克之因墮其城先是呼沙呼命築寨浚濠為備及西
城墮兩軍皆未能入但於城上立柵自蔽呼沙呼摘三
面精銳日夕戰禦金主謂侍臣曰我為金紫十年太子
十年人主十年自知無大過惡死無所恨所恨者祖宗

傳祚百年至我而絕與古荒淫暴亂之君等為亡國獨
為此介介耳又曰亡國之君往往為人囚繫或為俘獻
或辱於階庭或閉之空谷朕必不至於此卿等觀之朕
志決矣以御用器皿賞戰士已而徵服率兵夜出東城
謀遁去及柵遇敵兵戰而還殺廐馬以犒將士然其勢
不可為已時金徐州節度使郭葉嚕約源州叛將瑪宗
襲破徐州徐州將士以蔡州被圍又迫於蒙古兵議出
降完顏賽布弗從恐被執投河軍士援出之賽布自縊

而死瑪宗遂以州降蒙古 丙戌以史彌遠為太師左
丞相鄭清之為右丞相並兼樞密使加食邑千戶薛極
為樞密使喬行簡陳責誼參知政事帝諭貴誼曰頃聞
憂國之言朕所不忘彌遠拜左相一日以疾求解政詔
彌遠有定策大功勤勞王室宜加優禮於是授保寧昭
信節度使充醴泉觀使封會稽郡王奉朝請二子一壻
五孫皆加官秩越八日乙未卒彌遠為相凡二十六年
用事專且久權傾內外初欲反韓侂冑所為收召賢才

老成布於朝廷及濟王不得其死論者紛起遂專任僉
壬以臺諫一時君子貶斥殆盡帝德其立已唯言是從
故恩寵終其身十一月乙巳給事中莫澤言提舉千
秋鴻禧觀梁成大暴狠貪婪苟賤無恥遂寢成大祠命
澤遷刑部尚書既而臺臣交劾澤貪淫忮害又論工部
尚書李知孝侵欲無厭皆罷之三人黨附史彌遠排斥
諸賢成大尤心術嶮巇凡可賊害忠良者率攘臂為之
四方賂遺列置堂無導賓客觀之欲其效尤奪占宇文

氏賜第既擯歸訟之者數百人朝命毀其廬雖知孝亦
鄙其為人嘗曰所不堪者他日與成大同傳耳至是皆
貶尋謫居遠州盡追爵秩天下快之 丙午詔改明年
為端平元年帝始親政勵精求治鄭清之亦慨然以天
下為己任收召賢才擢用之 召陳埴為樞密院編修
官入對首言天下之安危在宰相南渡以來屢失機會
秦檜死所任万俟卨沈該耳韓侂胄死所任史彌遠耳
此今日所當謹也次言內廷當嚴宦官之禁外廷當嚴

臺諫之選宦者陳洵益陰中之監察御史王定劾墳出
知常州 己未進魏了翁為華文閣待制知瀘州了翁
應詔上章論十弊乞復舊典以彰新化一復三省之典
以重六卿二復二府之典以集衆議三復都堂之典以
重省府四復侍從之典以來忠告五復經筵之典以熙
聖學六復臺諫之典以公黜陟七復制誥之典以謹命
令八復聽言之典以通下情九復三衙之典以彊主威
十復制閫之典以黜私意疏列萬言先引故實次陳時

樊分別利害聚若白黑帝讀之感動 丙寅趙范言宣
和海上之盟厥初甚堅迄以取禍其事不可不鑑帝嘉
納之丁卯詔趙葵任責防禦 戊辰禮部郎中洪咨夔
進對帝問以今日急務咨夔言進君子退小人開誠心
布公道因乞召用崔與之真德秀魏了翁帝納之命咨
夔與王遂並拜御史咨夔謂遂曰朝無臺諫久矣要當
極本原而先論之乃上疏曰臣歷考往古治亂之原權
歸人主政出中書天下未有不治權不歸人主則庶級

一夷綱常且不立矣政之問政不出中書則腹心無寄
必轉而他屬矣權之攬此八政馭羣臣所以獨歸之王
而詔之者必天官冢宰也陛下親政以來威福操柄收
還掌握揚庭出令震撼海宇天下始知有吾君元首既
明股肱不容於自惰撤副封罷先行坐政事堂以治事
天下始知有朝廷此其大權大政亦畧舉矣然中書之
弊端其大者有四一曰自用二曰自專三曰自私四曰
自固願陛下於從容論道之頃宣示臣言俾大臣克初

志而加定力懲往轍而圖方來以仰稱勵精更始之意
帝嘉納之 己巳趙葵入見帝問以金事對曰今國家
兵力未贍姑從和議俟根本既壯雪二帝之恥以復中
原帝曰卿父子兄弟宣力甚多卿在行陣又能率先士
卒捐身報國此尤儒臣之所難朕甚嘉之葵頓首謝

陳德剛醇正明決與史彌遠同鄉里每以濟王之事責
彌遠故奉祠者十年至是復用為福建制置使兼知福
州及入對帝慰勞甚至因問夾攻蔡州以復讎何如德

剛曰此在國家不可一日而忘此舉但恐此舉之後方
煩聖慮耳帝曰朕與廷臣深計之時不可失也德剛曰
所謂時者人材資用無匱之謂陛下信有之乎帝默然
德剛居位七日而卒 十二月庚辰樞密使薛極罷初
極與胡榘聶子述趙汝述附史彌遠最親信用事時人
謂之四木至是罷知紹興府兼浙東安撫使 戊申洪
咨夔言提舉洞霄宮袁韶仇視善類諂附史彌遠詔罷
祠祿又論趙善湘鄭損陳洵約賂彌遠怙勢肆奸失江

淮荆襄蜀漢人心罪狀顯著詔善湘有討李全功特寢
免咳與祠損落職與祠 是歲蒙古勅修孔子廟及渾

天儀

端平元年春正月庚子朔詔求直言大府卿吳潛應詔
陳九事忤執政意罷奉千秋鴻禧祠祕書郎蔣重珍上
五事且曰隱蔽君德昔咎故相故臣得以專詆權臣昭
明君德今在陛下故臣得以責難君父乞名真德秀魏
了翁用之帝謂之曰人主之職無他惟辨君子小人重

珍對曰君子指小人為小人小人亦指君子為小人此
為難辨人主當精擇人望處之要津正論日聞則必知
君子姓名小人情狀矣詔兼崇政殿說書重珍戒家事
勿以白務積精神以寤上意每草奏齋心盛服有密啟
則手書削藁帝稱其忠實 己巳賜故少傅權參知政
事任希夷謚宣憲 丙午詔趙范兼淮西制置副使任
責防禦 太白熒惑合在斗 戊申孟珙同蒙古兵圍
蔡州會飲歌吹聲相接城中饑窘歎息而已珙見黑氣

壓城日無光降者言城中絕糧已三月鞍靴敗鼓皆糜
煮且聽以老弱互食諸軍日以人畜骨和芹泥食之又
往往斬敗軍全隊拘其肉以食故欲降者衆珙乃下令
諸軍銜枚分運雲梯布城下金自被圍以來將帥戰沒
甚衆至是以近侍分守四城蒙古兵鑿西城為五門以
入督軍鏖戰及暮乃退聲言來日復集是夕金主集百
官傳位於東面元帥承麟承麟世祖之後巴薩之弟也
拜泣不敢受金主曰朕所以付卿者豈得已哉以朕肌

體肥重不便鞍馬馳突卿平日趨捷有將畧萬一得免
祚脣不絕此朕志也承麟乃起受璽己酉即位時孟珙
之師向南門至金字樓列雲梯令諸將聞鼓則進馬義
先登趙榮繼之萬衆競入大戰城上烏庫哩鎬及其將
帥二百人皆降時百官稱賀禮畢亟出捍敵而南城已
立宋幟俄頃四面鼓譟夾攻聲震天地南面守者棄門
走孟珙招江海塔齊爾之師以入塔齊爾帥精兵一千
巷戰不能禦金主自經於幽蘭軒呼沙呼聞之謂將士

曰吾君已崩何以戰為吾不能死於亂兵之手吾赴汝
水從吾君矣諸君其善為計言訖赴水死將士皆曰相
公能死吾輩獨不能耶於是參政富珠哩小羅索烏琳
達呼圖總帥元吉元帥呼善爾赫舍哩柏壽烏庫哩桓
端及軍士五百餘人皆從死焉呼沙呼狀貌不踰常人
平生喜怒未嘗妄發聞人過常護諱之雖在軍旅手中
不釋卷家素貧敝衣糲食終其身晏如也雅好賓客及
薦舉人才人有寸長必極口稱道其掌軍務賞罰明信

號令嚴整故所至軍民咸樂為用至危急死生之際無一人有異志者南遷以後將相文武忠亮始終無瑕者呼沙呼一人而已承麟退保子城聞金主殂率羣臣入哭因謂衆曰先帝在位十年勤儉寬仁圖復舊業有志未就可哀也已宜諡曰哀莫未畢城陷諸將禁近共舉火焚之奉御完顏絳山收其骨將瘞之汝水上江海入宮執參政張天綱以歸孟珙問金主所在天綱以實告曰城危時即取寶玉寘小室環以草號泣自經曰死便

火我煙燄未絕珙乃與塔齊爾分金主骨及寶玉法物
承麟亦為亂兵所殺金亡

史臣曰金之初興天下莫強焉太祖太宗威制中國
大槩欲效遼初故事立楚立齊委而去之宋人不競
遂失故物熙宗海陵濟以虐政中原觖望金事幾去
矣世宗以仁易暴休息斯民故金祚百有餘年由大
定之政有以固結人心爾章宗志存潤色誅求無藝
至於衛紹紀綱大壞宣宗南渡棄厥本根連兵宋夏

內致困憊哀宗之世無足為者區區生聚圖存於亡
力盡乃斃可哀也已雖然在禮國君死社稷哀宗無
愧焉

先是金有都提控畢資倫者為邊將所獲囚於鎮江土
獄脅誘百端終不肯降至此已十四年矣及聞金主自
經歎曰吾無所望矣容吾一祭吾君乃降耳主者信之
為屠牛羊設祭鎮江南岸資倫祭畢伏地大哭投江而
死聞者義之 戊辰史嵩之露布告金亡以陳蔡西北

地分屬蒙古蒙古命劉福為河南道總管嵩之遣郭春
按循故壤詣奉先縣汎掃祖宗諸陵孟珙還屯襄陽江
海還屯信陽王旻戍隨州王安國守棗陽蔣成守光化
楊恢守鈞州並益兵飭備經理屯田於唐鄧金穰延
烏勒登行省於息州與諸將帥日以酣歌為樂軍士淫縱
蔡州破與富珠哩中羅索爪爾佳糾珠等送款請降為金
主發喪設祭且諡曰昭宗州民因奉烏勒登為丞相中羅
索為平章舉城南遷遂焚樓櫓蒙古望見火起追及於

羅山自萬戶以下凡七百人皆被殺 二月辛未御史
洪咨夔言陛下親政之始斥逐李知孝梁成大天下固
已快之其餘謫事權姦黨私罔上倡淫黷貨罪大罰輕
者尚在仕籍詔俱削秩罷祠 丁亥詔端平元年正月
以前諸命官貶竄物故者許令歸葬 是月蒙古入徐
州金完顏用安自殺 三月己酉以賈似道為籍田令
似道涉子賈貴妃弟也少落魄為游博不事操行以蔭
補嘉興司倉帝以貴妃故累擢至大常丞益恃寵不檢

日縱游諸妓家夜即燕遊湖上不返帝嘗夜憑高望西湖中燈火異常時語左右曰此必似道也明日詢之果然使京尹史巖之戒之巖之對曰似道雖有少年氣習然其才可大用也 辛酉詔遣太常寺主簿朱揚祖閤門祇候林拓詣洛陽省謁八陵 夏四月辛未詔遣朱復之詣八陵相度修奉以荆襄兵五千護之未至西京諜報敵騎且至兵不敢進使者潛偕數騎星馳而往禮畢遽還諸陵無恙與否不可究詰也 史嵩之遣使以

孟珙所獲金哀宗遺骨獻於臨安時相侈大其事洪咨夔曰此朽骨耳函之以葬大理寺可也第當以金亡告九廟歸諸祖宗德澤況與大敵為鄰抱虎枕蛟事變叵測顧可侈因人之獲使邊臣論功朝臣頌德且陛下知慕崇政受俘之元祐獨不鑒端門受降之崇寧乎帝雖顧之不悉從也丙戌備禮告於太廟藏金哀宗骨於大理獄庫加孟珙帶御器械江海以下論功行賞有差知臨安府薛玠問張天綱曰有何面目到此天綱曰國之

興亡何代無之我金之亡比汝二帝何如瓊叱之明日
奏其語帝召天綱問曰汝真不畏死耶天綱對曰大丈夫
患死之不中節耳何畏之有因祈死不已帝不聽初
有司令天綱供狀必欲書金主為虜主天綱曰殺即殺
焉用狀為有司不能屈聽其所供天綱但書故主而已聞
者憐之後莫知其所終

考異薛鑑既云史嵩之以所獲金哀宗遺骨獻於臨安又云復

以完顏守緒骨來獻按守緒即哀宗也或云守緒疑是承麟按宋史理宗紀孟珙傳元史太宗紀及陳桎通鑑續編但言得哀宗之骨不及承麟明係薛氏之謬蓋以哀宗完顏守緒為二人也

監察御史

王遂言史嵩之本不知兵矜功自侈謀身詭秘欺君誤國留之襄陽一日則有一日之憂不報洪咨夔亦言殘金雖滅鄰國方強益嚴守備猶恐不逮豈可動色相賀渙然解體以重方來之憂帝嘉納之 丁酉臣僚言江淮荆襄諸路都大提點坑冶吳淵恃才貪虐籍人家貲以數百萬計其弟潛違道干譽引用匪類詔並落職放罷 五月庚子觀文殿大學士致仕薛極卒 左司郎官李宗勉面對言四事守公道以悅人心行實政以興

治功謹命令以一觀聽明賞罰以示勸懲次言楮弊願
詔有司始自乘輿宮掖下至百司庶府覈其冗蠹者節
之歲省十萬則十萬之楮可捐歲省百萬則百萬之楮
可捐也行之既久捐之益多錢楮相當所至流轉則操
吾贏縮之柄不在楮矣拜監察御史時方謀出師汴洛
宗勉言今朝廷安恬無異於常時士卒未精銳資糧未
充衍器械未犀利城壁未繕修於斯時也守禦猶不可
而況進取乎借曰今日得蔡明日得海又明日得宿亳

然得之者未必可守萬一含怒蓄忿變生倉猝將何以濟
臣之所陳豈曰外患終不可平土宇終不可復哉亦欲
量力以有為相時而後動耳願詔大臣愛日力以修內
治合人謀以嚴邊防節冗費以裕邦財招強勇以壯國
勢仍飭沿邊將帥毋好虛名而受實害左控右扼勿失
機先則以逸待勞以主禦客庶可保其無虞若使本根
壯固士馬精強觀釁而動用兵未晚也 召前江東提
點刑獄徐僑為太常少卿趣入覲手疏數千言皆感情憤

剗切上廟主闕下逮羣臣分別黑白無所回隱帝數慰諭之顧見其衣履垢敝愀然謂曰卿可謂清貧僑對曰臣不貧陛下廼貧耳帝曰朕何為貧僑曰陛下國本未建疆宇日蹙權幸用事將帥非材旱蝗相仍盜賊並起經用無藝帑藏空虛民困於橫斂軍怨於培克羣臣養交而天子孤立國勢阽危而陛下不悟臣不貧陛下乃貧耳又言今女謁閭宦相為囊橐誕為二豎以處國膏育而執政大臣又無和緩之術陛下此之不慮而耽樂

是從世有扁鵲將望見而却走矣時貴妃閻氏方有寵而內侍董宋臣表裏用事故僞論及之帝為之改容太息明日手詔罷邊帥之尤無狀者申警羣臣以朋黨為之戒命有司裁節中外浮費賜僞金帛甚厚僞固辭不受乙卯召魏了翁赴闕丙寅詔黃幹李燾李道傳陳宓樓昉徐宣胡夢昱等皆阨於權姦而各行其志沒齒無怨其賜謚復官仍錄用其子以旌忠義戴埴復元資以勵士風建陽縣盜發衆數千人焚劫邵武麻沙長

平 金武仙奔澤州戍兵殺之 六月戊辰朔鄭清之

等進奏選德殿柱有金書六字曰毋不敬思無邪帝曰

此座右銘也 庚午熒惑填星合於胃 戊寅以喬行

簡知樞密院事資政殿學士曾從龍參知政事大中大

夫鄭性之僉書樞密院事先是性之入對言陛下大開

言路以通壅蔽心苟愛君誰不欲言言不切直何能感

動譬如積水久壅一決其勢必盛其聲必激故言者多

則易於取厭言之激則難於樂受若少有厭倦動於辭

色則讒謫乘間或不自知矣願陛下明詔百辟滌去舊
汚一以清白相師權之所在勢所必趨恐懼戒謹尤防
其微以保終譽毋招謗議則朝綱肅而國體尊矣 太
常少卿徐僑侍講開陳友愛大義帝悟已邛詔復巴陵
縣公竝官爵有司檢視墓域以時致祭仍存恤其家時
竝妻吳氏自請為尼特賜號慧淨法空大師紹興府月
給衣資緡錢僑又請從祀周惇頤程顥程頤張載朱熹
以趙汝愚侑食寧宗帝皆聽納 召許應龍為禮部郎

官初應龍知潮州盜陳三槍起贛州出沒江西閩廣間
與鍾全相結勢甚熾樞密陳辯帥江西任應龍討捕應
龍調水軍土兵分扼要害斷橋開塹斬木塞途諭統領
領官齊敏曰兵法攻瑕今鍾全殘寇將盡而陳三槍勢
方猖獗若先破鍾則陳不戰禽矣敏如其言於是諸寇
皆平至是召入對帝謂之曰卿治潮有聲與李宗勉治
台齊名應龍頓首曰民無不可化顧牧民者如何耳遷
國子司業徐僑議學校差職欲先譽望應龍以為不若

資格資格一定則僥倖之門杜而造請之風息矣僑然
之 辛巳詔贈史彌資政殿大學士諡忠宣 熒惑犯

填星 戊子日暈不匝生格氣 癸巳史嵩之進兵部

尚書趙范趙葵欲乘時撫定中原建守河據關收復三
京之議朝臣多以為未可獨鄭清之力主其說乃命趙
范移司黃州刻日進兵范叅議官邱岳曰方興之敵新
盟而退氣盛鋒銳寧肯捐所得以與人耶我師若往彼
必突至非惟進退失據開釁致兵必自此始且千里長

驅以爭空城得之當勤餽餉後必悔之范不聽史嵩之
亦言荆襄方爾饑饉未可興師杜杲復陳守境之利出
師之害喬行簡時在告上疏曰方今境內之民困於州
縣之貪刻阨於勢家之兼并饑寒之氓常欲乘時而報
怨荼鹽之寇常欲伺間而竊發蕭牆之憂凜未可保萬
一兵興於外綴於強敵而不得休潢池赤子復有如江
閩東浙之事其將奈何夫民至愚而不可忽內郡武備
單弱民之所素易也往時江閩東浙之寇皆藉邊兵以

制之今此曹猶多竄伏山谷窺伺田里彼知朝廷方有事於北方其勢不能以相及寧不動其奸心臣恐北方未可圖而南方已先騷動矣願堅持聖意定為國論以絕紛紛之說皆不聽 淮西總領吳潛又告執政論用兵復河南不可輕易以為金人既滅與北為鄰法當以和為形以守為實以戰為應自荆襄首納空城合兵攻蔡兵事一開調度寢廣百姓狼狽死者枕藉使生靈肝腦塗地得城不過荆榛之區獲俘不過曖昧之骨而吾

之內地荼毒如此邇臣誤國之罪不待言矣聞有進恢
復之畫者其筭可謂俊傑然取之若易守之實難征行
之具何所取資民窮不堪激而為變內郡率為盜賊矣
今日之事豈容輕議 詔知廬州金子才合淮西兵萬
人赴汴時汴京都尉李伯淵李琦李賤奴等為崔立所
侮謀殺之及聞子才軍至伯淵等以書約降而陽與立
謀備禦之策伯淵夜燒封邱門以警動立立殊不安一
夕百卧起比明伯淵等約立視火立從苑秀折希顏等

數騎往既還伯淵送之倉卒中就馬上抱立立顧曰汝
欲殺我耶伯淵曰殺汝何傷即出匕首橫刺之立墜馬
死伏兵起元帥薩哈殺苑秀折希顏後至亦被殺伯淵
繫立尸馬尾至內前號於衆曰立殺害刼奪烝淫暴虐
大逆不道古今無有當殺之否萬口齊應曰寸斬之未
稱也乃梟立首望承天門祭哀宗伯淵以下軍民皆慟
或剖其心生噉之以三尸掛闕前槐樹上樹忽拔人謂
樹有靈亦厭其為所汙云 金子才次於汴趙葵自滌

州以淮西兵五萬取泗州由泗趨汴以會之葵謂子才
曰我輩始謀據關守河今已抵汴半月不急攻洛陽潼
關何待耶子才以糧餉未集對葵督促益急乃檄鈴轄
范用吉樊辛季先胡顯等提兵萬三千命淮西制置司
機宜文字徐敏子為監軍先令西上又命楊誼以廬州
強弩軍萬五千繼之各給五日糧 秋七月徐敏子啟
行遣和州寧淮軍正將張迪以二百人趣洛陽迪至城
下城中寂然無應者至晚有民庶三百餘家登城投降

迪與敏子遂帥衆入城蒙古主聞之遣國王齊拉衮引兵南下時汴隄決水潦泛溢糧運不繼所復州郡皆空城無兵食可因敏子入洛之明日軍食已竭乃采蒿和麪作餅而食之楊誼至洛東三十里方散坐蓐食忽見數里外有立黃紅涼繖者衆方駭異而蒙古伏兵突起深蒿中師遂大潰為蒙古擁入洛水死者無數誼僅以身免是晚有潰卒奔告於洛曰楊誼一軍已衝散今蒙古兵據北岸矣在洛之師皆奪氣八月朔旦蒙古兵

至洛陽下立砦徐敏子與戰勝負相當士卒乏糧因殺馬而食敏子等不能留乃班師趙葵金子才在汴亦以史嵩之不致餽蒙古兵又決黃河寸金淀之水以灌官軍官軍多溺死遂皆引師南還 甲戌朱揚祖林拓以八陵圖上進帝問諸陵相去幾何及陵前澗水新復揚祖悉以對帝忍涕太息久之初揚祖等行至襄陽會謀報蒙古哨騎已及孟津陝府潼關河南皆增屯戍設伏兵又聞淮閫刻日進師衆畏不前孟珙曰淮東之師由

淮西遡汴非旬餘不達吾選精騎疾馳不十日可竣事
逮師至東京吾已歸矣於是珙與二使晝夜兼行至陵
下奉宣御表成禮而還 是月權知邵武軍王埜討平
建陽盜 九月壬寅趙范以入洛之師敗績上表劾趙
葵金子才輕遣偏師復西京趙楷劉子澄參贊失計師
退無律致後陣覆敗詔趙葵削一秩措置河南京東營
田邊備金子才削一秩措置唐鄧息州營田邊備劉子
澄趙楷並削秩放罷又言楊誼一軍之敗皆由徐敏子

范用吉怠於赴援致不能支詔用吉降武翼郎徐敏子
削秩放罷楊誼削四秩勒停自效 己酉真德秀言權
臣罔上講筵官亦傳會其言今承其弊有當慮者五事
并及泉漳寇盜鹽法之弊帝嘉納之 詔進士何霆編
類朱熹解注文字有補經筵授上文學 京湖制置使
史嵩之罷以趙范代之 冬十月召真德秀為翰林學
士魏了翁直學士院時江淮有進取潼關黃河之議德
秀上封事曰移江淮甲兵以守無用之空城運江淮金

穀以治不耕之廢壤富庶之效未期根本之弊立見惟
陛下審之重之進戶部尚書入見帝謂曰卿去國十年
每切思賢德秀以大學衍義進因言於帝曰天之所助
者順人之所助者信陛下欲祈天永命唯存乎敬而已
敬者德之聚儀狄之酒南威之色盤游弋射之娛禽獸
狗馬之玩有一於此皆足害敬今天之厭亂久矣陛下
儻能敬德以迓續休命中原終為吾有若徒以力求之
而不反其本天意難測臣實憂之魏了翁入對首乞明

君子小人之辨以為進退人物之本以杜奸邪窺伺之
端次論故相十失猶存次及修身齊家選宗賢建內小
學等皆切於上躬者他如和議不可信北軍不可保軍
實財用不可恃凡十餘端復口奏利害畫漏下四十刻
而退帝皆嘉納之 辛卯參知政事兼同知樞密院事
致仕陳貴誼卒 孟珙留襄陽招中原精銳之士萬五
千餘人分屯渚北樊城新野唐鄧間以備蒙古名鎮北
軍十一月壬子詔以襄陽府駐劄御前忠衛軍為名命

珙兼領之 壬戌太白經天 十二月己卯蒙古遣王
楫來責敗盟辛卯遣鄒伸之李復禮喬仕安劉溥報謝
自是河淮之間無寧息之日矣

資治通鑑後編卷一百四十